

---

## **PROPOSICIÓN DO GRUPO MUNICIPAL DE COMPOSTELA ABERTA PARA A MELLORA DA MOBILIDADE NA CONTORNA DO 'CAMPUS' DE LAMAS DE ABADE**

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte proposición para o seu debate no Pleno. A proposta de acordo ten como obxectivo que o goberno municipal considere a proposta elaborada pola ANPA do IES Lamas de Abade para realizar as pertinentes actuacións de mellora na contorna dos centros educativos da zona, co obxectivo de mellorar a mobilidade e a seguranza viaria tanto para peóns como para vehículos.

### **EXPOSICIÓN DE MOTIVOS:**

Nos últimos anos toda a zona de Lamas de Abade, no barrio do Castiñeiriño, tense convertido nun auténtico Campus educativo que conta con numerosos centros de ensino como o propio Instituto de Ensino Secundario Lamas de Abade, o Colexio público de infantil e primaria Lamas de Abade, o Centro Integrado de Formación Profesional Compostela, o Xardín de Infancia Raiola ou mesmo o Centro Autonómico de Formación e Innovación (CAFI) e o Centro de Educación Especial Duques de Lugo.

Tal concentración de centros produce uns grandes problemas de mobilidade por causa desta converxencia de alumnado e familias, moitas veces ás mesmas horas do día e durante case toda a xornada. No mandato anterior, o goberno de Compostela Aberta tiña este problema detectado e comezou a actuar para mellorar a mobilidade peonil na contorna dos centros, para posteriormente procurar un abordamento da mobilidade de vehículos.

Así, nesa zona, e mediante o proceso dos Orzamentos Participativos de 2017 aprobáronse dúas propostas, que foron as máis votadas, por iniciativa da ANPA do CEIP Lamas de Abade. En concreto a construción da senda peonil cuberta que une o Centro de Educación Infantil e Primaria co CIFP, onde os nenos e nenas do CEIP teñen o servizo de comedor. Unha actuación, orzada en 60.000 euros, e que permite que as crianzas realicen o percorrido ata a escola de hostalería dun xeito máis seguro, e a salvo das inclemencias do tempo. A outra actuación pendente en Lamas de Abade era a mellora dos accesos aos centros educativos, e que naquela altura foi orzamentada en 136.000 euros. Un proxecto que non puido levar adiante pendente da concesión de permisos por parte doutra administración.

Xa no actual mandato municipal, a ANPA do IES Lamas de Abade encargou un proxecto no que contando coa cesión de terreo por parte da Consellaría de Educación e o CEIP -que xa mostraron a súa disposición favorable- procúrase ordenar o tránsito rodado e peonil na contorna dos centros, sobre todo no actual cruce de camiños onde converxen varios itinerarios. Neste punto, para favorecer a mobilidade e sobre todo a convivencia do tránsito dos autobuses escolares co tránsito rodado residencial propoñen unha glorieta para poder delimitar a circulación nun único sentido da marcha. Con estas actuacións aproveitaríase esta actuación para xenerar e difinificar o espazo público que rodea ao cruceiro e á capela creando unha zona de estar-miradoiro. Ademais neste mesmo proxecto propónse na Rúa Divina Pastora realizar o tránsito peonil ao abrigo da fileira de árbores actualmente existente e pola zona verde par chegar ata o propio edificio do CEIP.

Esta proposta de mobilidade elaborada pola ANPA foi cuantificada, en abril do 2021 en 165.964,46€ como base de licitación, incluíndo as demolicións e retranqueos, os movementos de terras, os novos firmes e pavimentos, os peches, a iluminación e ata a xestión de residuos. Unha proposta da que é coñecedora o goberno municipal e que pode solicitarse á propia ANPA do IES Lamas de Abade, quen ten mostrado esta actuación como prioritaria nesta contorna, ao igual que a ANPA do CEIP e a AVV do Castiñeiriño quen é da mesma opinión sobre a necesidade e urxencia desta obra.

Sen embargo o Concello de Santiago licitou a "Mellora dos accesos peonís cara aso centros educativos de Lamas de Abade (FASE I)" por 85.000€ actuando na rúa da Chaparra e a rúa Lamas de Abade, obra realizada recentemente é que se manifesta como insuficiente e mesmo mal executada se temos en conta as queixas continuas que manifesta a comunidade educativa destes centros.

Tendo en conta todo o anterior, que os problemas de mobilidade no 'campus' de Lamas de Abade aínda non están resoltos, o Grupo Municipal de Compostela Aberta presenta para debate plenario, o seguinte **ACORDO**:

- **Instar ao correspondente órgano de goberno a ter en conta o anteprojecto elaborado pola ANPA do IES Lamas de Abade para realizar as pertinentes actuacións de mellora na contorna dos centros educativos da zona, co obxectivo de mellorar a moblidade e a seguranza viaria tanto para peóns como para vehículos.**

Santiago de Compostela, 21 de Novembro de 2022



María Rozas Pérez

Portavoz do grupo municipal de Compostela Aberta

**Á ATENCIÓN DO ALCALDE DE SANTIAGO**